

**Ákvörðun Samgöngustofu nr. 66/2018 vegna kvörtunar um aflýsingu á flugi
VY8560 þann 15. maí 2017.**

I. Erindi

Þann 20. maí 2017 barst Samgöngustofu (SGS) kvörtun frá A og B kvartendur). Kvartendur áttu bókað far með flugi Vueling airlines (VY) VY8560 frá Barcelona til Keflavíkur þann 15. maí 2017 en á flugi til Keflavíkur var vélinni snúið til Glasgow vegna slæmra veðuraðstæðna í Keflavík og var fluginu í kjölfarið aflýst.

Í kvörtuninni kemur fram að kvartendur hafi ekki fengið afhentar upplýsingar um réttindi flugfarþega.

Kwartendur fara fram á skaðabætur samkvæmt reglugerð EB nr. 261/2004 sbr. reglugerð nr. 1048/2012.

II. Málavextir og bréfaskipti

Í kvörtun kemur fram að flugi VY8560 hafi verið snúið til Glasgow á miðri leið þar sem veðuraðstæður í Keflavík hafi verið slæmar. Við lendingu hafi farþegum verið boðið að fara frá vélinni og koma sér sjálf á leiðarenda. Sumir farþegar nýttu sér þann valmöguleika en öðrum farþegum, þ. á m. kvartendum, var flogið til Barcelona. Þar var farþegum boðin gisting á hótelí og flug frá Barcelona til Keflavíkur kl. 13:15 daginn eftir.

SGS sendi VY kvörtunina til umsagnar með tölvupósti, dags. 1. júní 2017. Í svari VY sem barst SGS þann 13. júní 2017 kemur fram afstaða félagsins um að aflýsing á flugi VY8560 15. maí 2017 hafi ekki verið bótaskyld. Hafi fluginu verið aflýst vegna slæmra veðuraðstæðna á Keflavíkurflugvelli sem teljist óviðráðanlegar aðstæður í skilningi 3. mgr. 5. gr. reglugerðar EB nr. 261/2004. Einnig gerði viðgerð á flugbrautum erfiðara fyrir lendingu í Keflavík ásamt erfiðum aðstæðum á varaflugvöllum á Íslandi. Þá telur VY að viðbrögð sín við hinum óviðráðanlegu aðstæðum hafi verið forsvaranleg.

Svör VY voru send kvartendum til athugasemda með tölvupósti dags. 13. júní 2017. Í svari kvartenda sem barst 21. júní 2017 er m.a. vísað til þess að önnur flug til Keflavíkur þann 15. maí 2017 hafi lent þann dag og því hafi veðuraðstæður og viðgerð á flugbrautum ekki getað talist til óviðráðanlegra aðstæðna. Þá telja kvartendur að flugfélagið hafi ekki gert allt sem í valdi þess stóð til að afstýra neikvæðum afleiðingum vegna óviðráðanlegra aðstæðna. Að mati

kvartenda var vélinni hugsanlega snúið til Glasgow vegna þessa að áhöfnin væri komin yfir, eða farin að nálgast, hámarks vinnutíma.

III. Forsendur og niðurstaða Samgöngustofu

Neytendur flugþjónustu eða aðrir sem hagsmuna hafa að gæta sem telja að flugrekandi, flytjandi, ferðaskrifstofa eða umboðsmaður framangreindra aðila hafi brotið gegn skyldum sínum samkvæmt lögum um loftferðir nr. 60/1998 eða reglugerðum settum á grundvelli þeirra geta beint kvörtun til Samgöngustofu, sbr. 1. mgr. 126. gr. c. loftferðarlaga. Stofnunin tekur málið til skoðunar í samræmi við ákvæði laganna og stjórnsýslulaga nr. 37/1993 og sker úr ágreiningi með ákvörðun, sbr. 3. mgr. 126. gr. c og 140. gr. loftferðalaga, ef hann verður ekki jafnaður með öðrum hætti. Sú ákvörðun er bindandi.

Um réttindi flugfarþega er fjallað í reglugerð EB nr. 261/2004 um sameiginlegar reglur um skaðabætur og aðstoð til handa farþegum sem neitað er um far og þegar flugi er aflýst eða mikil seinkun verður, sem var innleidd hér á landi með reglugerð nr. 1048/2012. Samkvæmt 3. gr. reglugerðar nr. 1048/2012 er Samgöngustofa sá aðili sem ber ábyrgð á framkvæmd reglugerðarinnar samanber 16. gr. reglugerðar EB nr. 261/2004.

Um aflysingu flugs og þá aðstoð sem flugrekandi skal veita í slíkum tilvikum er fjallað um í 5. gr. reglugerðar EB nr. 261/2004. Samkvæmt 1. mgr. 5. gr. skal farþegum ef flugi er aflýst, boðin aðstoð af hálfu flugrekandans í samræmi við 8. gr. og a-lið 1. mgr. 9. gr. og 2. mgr. 9. gr. Í 8. gr. reglugerðarinnar er fjallað um rétt farþega til þess að fá endurgreitt eða að fá flugleið breytt. Þar kemur nánar tiltekið fram að flugfarþegar eigi eftirfarandi kosta vöл; að fá innan sjö daga endurgreitt að fullu upprunalegt verð farmiðans, að breyta flugleið, með sambærilegum flutningsskilyrðum, til lokaákvörðunarstaðar eins fljótt og auðið er, eða að breyta flugleið, með sambærilegum flutningsskilyrðum og komast til lokaákvörðunarstaðar síðar meir.

Auk framangreinds gildir að sé flugi aflýst eiga farþegar rétt á skaðabótum frá flugrekanda í samræmi við 7. gr., hafi ekki verið tilkynnt um aflysingu á þann hátt sem mælt er um í i) – iii) liðum c-liðar 1. mgr. 5. gr. Þetta gildir nema flugrekandi geti sýnt fram á að flugi hafi verið aflýst af völdum óviðráðanlegra aðstæðna sem ekki hefði verið hægt að afstýra jafnvel þótt gerðar hefðu verið allar nauðsynlegar ráðstafanir, sbr. 3. mgr. 5 gr. reglugerðarinnar.

Loftferðalögum nr. 60/1998 og reglugerð EB nr. 261/2004 er ætlað að tryggja ríka vernd fyrir farþega sem neytendur flugþjónustu. Meginreglan samkvæmt reglugerð EB nr. 261/2004 er réttur farþega til skaðabóta skv. 7. gr. reglugerðarinnar sé um að ræða aflysingu eða mikla seinkun á brottfarartíma flugs og ber að skýra undantekningarreglu 3. mgr. 5. gr. reglugerðarinnar þróngt, sbr. dóm Evrópuðomstólsins frá 22. desember 2008, í máli C-549/07 Friedericke Wallentin-Hermann v Alitalia og almennar meginreglur um túlkun lagaákvæða.

Álitaefni í þessu máli er hvort að óviðráðanlegar aðstæður hafi valdið aflýsingu á flugi kvartenda. Í fylgigönum í athugasemdum VY við kvörtun koma fram upplýsingar úr flugrekstrarkerfi VY sem sýnir fram á að hætt hafi verið við lendingu í Keflavík í miðju flugi vegna slæms veðurs og vélinni snúið til lendingar í Glasgow. Áætlað var að taka auka eldsneyti og fljúga aftur til Keflavíkur án þess að farþegar færð frá borði. Um einni og hálfri klukkustund eftir lendingu í Glasgow fá farþegar þær fregnir að snúið verði aftur við til Barcelona. Í flugrekstrarkerfi VY kemur fram að hætt hafi verið við að reyna flug aftur til Keflavíkur þar sem veðurspár fyrir Keflavík og varaflugvelli á Íslandi voru slæmar auk bilunar í aðflugsbúnaði á Egilsstöðum og óhagstæðum vindáttum á Akureyri. Þá færði VY fram ítarlegar flugvallarveðurskýrslur og veðurspár fyrir Keflavíkurflugvöll og varaflugvelli. Á móti kom fram í gögnum málsins að raunverulegt veður á lendingartíma hafi ekki verið slæmt og að það hafi almennt ekki truflað flugumferð. Gögn í öðrum málum vegna sama flugs sýndu einnig fram á að þennan dag virðast önnur flug hafa getað lent í Keflavík, einnig á þeim tíma sem flug VY8560 átti að lenda.

Við mat á því hvort að flugrekendur geti borið fyrir sig slæmar veðuraðstæður sem óviðráðanlegar aðstæður í skilningi 3. mgr. 5. gr. reglugerðar EB nr. 261/2004 eru ákvarðanir flugrekenda og áhafna þeirra vegna veðurs að jafnaði ekki dregnar í efa. Hins vegar telur SGS rétt að flugrekandi þurfi að færa fram sönnun þess efnis að veðuraðstæður eða veðurspá hafi verið slæm og að slíkar aðstæður kynnu að hafa áhrif á flug. Að mati SGS hefur VY fært fram nægjanleg gögn og röksemadir til að sýna fram á að veðuraðstæður á Íslandi 15. maí 2017 kynnu að hafa haft áhrif á flug VY8560 til Keflavíkur þann dag. Má þar helst benda á flugvallarveðurspá fyrir Keflavíkurflugvöll sem spáði mjög slæmu veðri milli kl. 12:00 til 21:00 þann 15. maí en áætlaður lendingartími var kl. 21:55. Þá var miklum vindri spáð þann dag milli kl. 21:00 til 24:00. Að mati flugáhafnar hefði hugsanlega þurft að lenda með vindri sem hefði neikvæð áhrif á lendingargetu en einnig voru framkvæmdir á flugbrautum þennan dag sem höfðu einnig neikvæð áhrif á lendingargetu. Þá sýna flugvallarskýrslur og veðurspár að veður á varaflugvöllum þennan dag hafi verið nokkuð vindasamt með lágri skyjahæð. Þrátt fyrir að veður hafi reynst betra en spár gerðu ráð fyrir og að önnur flugumferð hafi ekki orðið fyrir truflun vegna veðurs þennan dag var ákvörðun flugáhafnar í flugi VY8560 um að hætta við lendingu í Keflavík byggð á upplýsingum sem gáfu til kynna að veðuraðstæður væru hugsanlega slæmar. Því má telja að óviðráðanlegar aðstæður hafi valdið því að hætt hafi verið við lendingu í Keflavík og í kjölfarið valdið aflýsingu flugs VY8560 sbr. 3. mgr. 5. gr. reglugerðar EB nr. 261/2004.

Eftir lendingu í Glasgow fór hluti farþega frá borði eftir nokkra töf. Komi upp óviðráðanlegar aðstæður skv. 3. mgr. 5. gr. reglugerðar EB nr. 261/2004 hvílir skylda á flugrekendum að lágmarka eftir bestu getu töf eða seinkun vegna slíkra aðstæðna. Að mati SGS er fyrirsjáanlegt að nokkur töf verði ef að snúa þarf flugi á miðri leið til lendingar á flugvelli þar sem ekki var gert ráð fyrir að lenda og miðað við frásögn kvartenda verður ekki talið að um óeðlilega töf hafi verið að ræða. Því telur SGS að VY hafi ekki vanrækt ofangreindar skyldur sínar með töf eftir við lendingu í Glasgow.

Með hliðsjón af ofangreindu eiga kvartendur ekki bótarétt skv. 5 og 7. gr. reglugerðar EB nr. 261/2004, sbr. reglugerð nr. 1048/2012, vegna aflýsingar á flugi VY8560 15. maí 2017.

Sé flugi aflýst eiga farþegar rétt á að velja á milli endurgreiðslu fargjalds, að fara aftur til brottfararflugvallar eða að nýta aðra kosti af hálfu flugrekanda til að komast á upprunalegan áfangastað sbr. a-c lið 1. mgr. 8. gr. reglugerðar EB nr. 261/2004. Flugi VY8560 var sannanlega aflýst þegar ákveðið var að snúa ekki aftur til Keflavíkur frá Glasgow. Kvartendur áttu rétt á að fara frá borði í Glasgow og fá flugfargjald endurgreitt en nýttu sér ekki þann kost. Með því að vera áfram um borð í vél VY telur SGS að kvartendur hafi samþykkt ráðstafanir félagsins um að koma þeim til leiðarenda með flugi frá Glasgow til Barcelona og frá Barcelona til Keflavíkur kl. 13:15 daginn eftir. Samþykki á slíkri ráðstöfun gefur kvartendum ekki sjálfstæðan bótarétt á grundvelli 7. gr. reglugerðar EB nr. 261/2004.

Seinkun varð á flugi VY frá Barcelona þann 16. maí 2017. Miðað við upplýsingar í athugasemdum kvartenda frá 21. júní virðist brottför hafa tafist um 1 klukkustund og 45 mínútur. Til að flug teljist bótaskylt verður töf að nema a.m.k. 3 klukkustundum. Bera gögn málsins því ekki með sér að um bótaskylda seinkun hafi verið að ræða á heimflugi frá Barcelona 16. maí 2017 og eiga kvartendur því ekki bótarétt á grundvelli 7. gr. reglugerðar EB nr. 261/2004, sbr. reglugerð 1048/2012, vegna flugsins.

Kvartendur virðast ekki hafa fengið skriflegar upplýsingar um rétt sinn og telst það brot á 2. mgr. 14. gr. reglugerðar EB nr. 261/2004.

Ákvörðunaronar

Kröfu kvartenda um skaðabætur úr hendi Vueling airlines skv. reglugerð EB nr. 261/2004 sbr. reglugerð 1048/2012, er hafnað.

Vueling airlines hefur brotið gegn ákvæðum 14. gr. reglugerðar EB nr. 261/2004 sbr. reglugerð nr. 1048/2012. Er þeim fyrmælum beint til Vueling airlines að félagið fari að ákvæðum 14. gr. eftir því sem við á gagnvart hverjum farþega.

Ákvörðun þessi er kæranleg til samgöngu- og sveitarstjórnarráðuneytisins skv. 3. mgr. 126. gr. c loftferðalaga nr. 60/1998 og 18. gr. laga nr. 119/2012 um Samgöngustofu, stjórnsýslustofnun samgöngumála. Kæra skal berast ráðuneytinu innan þriggja mánaða frá því að viðkomandi var tilkynnt um ákvörðun þessa.

Reykjavík, 13. febrúar 2018

Ómar Sveinsson
fagstjóri neytendamála

Davíð Örn Guðnason
lögfræðingur